



PROSESYON PADULONG SA KALBARYO, NI BERNARDO CAVALLINO, CHRYSLER MUSEUM OF ART

Wala Gayud Siya Moatras

Didto sa bungtod nga gitawag og Kalbaryo, samtang ang walay mahimo nga mga sumusunod nagtan-aw, ang Iyang samdan nga lawas gilansang sa krus. Sa walay kalooy Siya gibugal-bugalan ug gipanghimaraut ug gitamay. . . .

“Ang makapahingutas nga mga oras milabay samtang nagkaduol na ang Iyang kamatayon. Gikan sa Iyang nag-uga nga mga ngabil migawas ang mga pulong, ‘Amahan, nganha sa imong mga kamot itugyan ko ang akong espiritu: ug sa nakapamulong siya niini, nabugto ang iyang ginhawa.’ . . .

“Sa katapusang gutlo, ang Manluluwas mahimo ra untang moatras. Apan wala Niya buhata. Nagpaubos Siya sa tanang mga butang nga unta Iyang maluwas ang tanang mga butang. Ang Iyang wala nay kinabuhi nga lawas dali nga gipahimutang sa hinulman nga lubnganan apan sa inananay nga paagi.”

Presidente Thomas S. Monson (1927–2018), “Siya Nabanhaw!” *Liahona*, Mayo 2010, 87.

Personal nga Paggamit: Miantus Siya og hilabihang kasakit, kamingaw, ug kaguol, apan sa gihapon ang Manluluwas milahutay ug nakahuman sa Iyang mortal nga panaw uban sa kamaayo—gani mihangyo pa sa Iyang Amahan sa pagpasaylo niadtong milansang Kaniya. Tungod sa Iyang hingpit nga ehemplo, makaatubang kita sa atong kaugalingong mga pagsulay ug kalisud uban sa kamaayo, ug uban sa Iyang tabang makalahutay usab kita hangtud sa katapusan.

Siya Lamang ang Bugtong Makahimo

Ang Iyang nabuhat mahimo lamang mabuhat sa Dios. Isip ang Bugtong Anak sa Amahan diha sa unod, napanunod ni Jesus ang balaanong mga hiyas. Siya ang bugtong tawo nga natawo dinhi sa mortalidad nga makahimo niining labing importante ug balaang buhat. Tungod kay Siya lang ang bugtong Tawo nga walay sala nga sukad nabuhi dinhi sa yuta, dili Siya ubos sa espiritwal nga kamatayon. Tungod sa Iyang pagka-dios, aduna usab Siyay gahum batok sa pisikal nga kamatayon. Sa ingon Iyang gihimo alang kanato ang unsay dili nato mahimo sa atong kaugalingon. Iyang gibugto ang mabugnawng pagkupot sa kamatayon. Gihimo usab Niyang posible alang kanato nga makabaton sa labing taas ug malinawon nga kahupayan sa gasa sa Espiritu Santo.”

Presidente James E. Faust (1920–2007), Ikaduhang Magtatambag sa Unang Kapangulohan, “The Atonement: Our Greatest Hope,” *Liahona*, Ene. 2002, 20.

Personal nga Paggamit: Pinaagi sa Iyang Pag-ula, ang Manluluwas mibadbad sa mga higot sa kamatayon ug mitubos kanatong tanan gikan sa atong mga sala aron ang kada usa ka tawo makabaton og kinabuhing dayon. Siya lamang ang makahimo sa pagtuman sa ingon ka makahadlok ug imposible nga buhat. Kon mag-atubang kita og grabing mga hagit, makakuha kita og kahupayan sa pagkasayud nga ang Manluluwas sa tinudanay makahimong posible sa imposible.

ANG PAGLUBONG, NI CARL HEINRICH BLOCH

